

曾文正公奏稿

曾文正公奏稿

卷之三十一目錄

湘軍在新野南陽勝仗摺

同治五年九月十三日

淮軍往來剿賊勝仗摺

全日

彙報近日軍情摺

十月十三日

病難速痊請開各缺仍畱軍中効力摺

全日

淮軍勝仗詳細情形摺

全日

調鮑超劉松山兩軍分路援剿摺

十一月初二日

奉到諭旨先行覆陳片

酌籌西路軍務派員辦霆營軍米摺

十一月十七日

欽奉 諭旨覆陳摺 全日

近日軍情片

欽奉 諭旨再陳下悃摺 十二月初三日

暫回本任仍駐徐州並陳下悃摺 十二月二十一日

近日軍情片

回駐徐州接篆任事摺 同治六年正月二十一日

近日軍情並陳鮑超暫緩入秦片

報銷款目分四案開單摺 二月初八日

恭報自徐州起程日期摺 二月十四日

張錫嶸在陝西陣亡請卹 恩片

報回省日期並近日軍情摺

三月二十日

通籌酌解陝甘軍餉片

鮑超傷疾甚劇酌調大員統軍摺

四月初七日

奏撥二成洋稅銀片

湘軍在新野南陽勝仗摺

同治五年九月十三日

奏爲官軍在新野南陽等處迎剿張牛逆股疊獲勝仗恭摺仰祈

聖鑒事竊皖南鎮總兵劉松山宣化鎮總兵張詩曰在新野等處剿賊獲勝臣於八月十二日附奏大概在案旋據劉松山等稟稱七月十四日聞宋慶一軍在刁河被圍立即拔隊馳援十五日行抵南陽探知豫軍業已解圍該逆向東南竄過瓦店一帶適白河水勢陡漲覓船駛渡十七八等日渡畢二十一日行抵隱灘與宋慶相見籌商會剿之策是時賊方攻破南陽之尹家寨屯聚各村議定宋慶一軍進左路張詩曰一軍進中路劉

松山一軍進右路行二里許步賊大隊分路撲近馬賊從兩旁包鈔勢甚披猖我軍三路迎敵戰未半時賊悉退守尹家寨爲負隅死拒之計劉松山揮眾猛攻一鼓下之各軍三路跟追至二十餘里之桑莊寨將賊踞村莊四十五處悉數奪回該逆大潰直奔向侯橋寨一路共計斃賊千餘人解散脅從甚夥是晚趕齊輜重躡宿桑莊寨二十二日整隊進抵侯橋寨張牛馬步大隊蟻聚對河相距四五里各軍商定仍分中左右三路宋慶居左張詩曰居中劉松山居右而於中右兩路又各分中左右三路回環策應蟬聯而進由河之南轉折向東追至新野所屬之上仙岡賊股愈出愈多兩旁村莊步賊結成圓陣數十起分

列以待騎賊數千包鈔我軍之後劉松山見賊挾全勢來抗嚴飭各營屹立穩持施放鎗礮步步轟擊未幾馬賊漸包漸近而中路賊勢尤厚先以大股衝撲中路之右經彭秀清羅朝雲率兩營抵住該逆卽直撲中路之左長矛數千分排林立我軍當中路之左者爲知府銜浙江同知朱式雲督率星豫三營施放噴筒步賊稍卻而馬賊又從星右營之後盤旋而入步賊於煙焰中持矛衝突我軍以短兵鏖戰一以當十血戰半時之久賊之矛桿摧折者猶徒手爭先裹創力戰星左營受敵最久幾不能支朱式雲持刀躍馬往來督陣賊勢漸靡劉松山張詩曰約同宋慶等率隊猛擊呼聲雷動立斃悍賊六七百名合軍追殺

十餘里遂收隊至上仙岡暫息是日計殺斃生擒及解散者不下三千名奪獲騾馬二百餘匹查點各軍陣亡者哨官花翎都司鄒明立一名受傷最重者副將黃瑞都司賀大有二名各勇陣亡者十八名受傷者二百四十九名由劉松山等詳細具報前來臣查張牛二逆前經劉松山張詩曰兩軍敗之於上蔡等處茲又追及南陽之尹家寨新野之上仙岡奮勇鏖戰雖殺賊不及前此之多而賊勢之悍臨陣之猛亦近來所罕見劉松山等聞豫軍被圍卽日馳援及解圍後卽與宋慶聯絡一氣同心苦戰尤得師克在和之義除將出力各員附上蔡案內彙獎外其陣亡之花翎都司鄒明立一員仰懇



天恩勅部照陣亡例議卹以慰忠魂所有官軍在新野南陽等處勦賊獲勝緣由恭摺由驛馳陳伏乞

皇太后

皇上聖鑒訓示再此案已據河南撫臣具奏合併聲明謹奏

淮軍往來勦賊勝仗摺

同治五年九月十三日

奏爲劉銘傳潘鼎新兩軍往來勦賊疊獲勝仗并現籌防勦事宜恭摺仰祈

聖鑒事竊捻逆東竄後調兵追勦

臣

於八月二十三日奏明在

案劉銘傳一軍於二十七日馳抵城武潘鼎新一軍於二十六

日馳抵濟甯是時賊正麇聚鄆鉅之間山東撫

臣

閻敬銘派出

之王成謙王正起兩軍三次進勦疊獲勝仗二十六至三十等

日該逆猛撲運河之袁口靳口開河等處東軍抵禦嚴密未能

搶渡其長溝以下之運防李昭慶一軍修築堅固又經潘鼎新

一軍趕至濟甯軍威頗壯該逆未敢撲犯三十日劉銘傳潘鼎

新會於汶上境內之馬村探知賊俱盤據梁山前後火光橫亙數十里九月初一日劉銘傳一軍由蔡家陵進潘鼎新一軍由方家廟進分道直薄梁山賊之馬隊由東至西包鈔而來張景春烏爾圖那遜督馬隊迎勦劉盛藻唐殿魁率步軍繼進陣斬悍逆數十名馬賊敗走其另股步賊三千餘名馬賊數百人自北而南正與潘鼎新一軍相遇潘鼎琛余在榜等施放炸礮潘鼎立率隊從旁鈔擊賊卽轉向西奔我軍三面齊進該逆盡向王莊奪路竄走烏爾圖那遜追至王莊逕入賊隊手斬馬賊身受矛傷五處猶不少卻經張佩之率隊衝進救護回營北路劉盛藻唐殿魁從後追到南路潘鼎琛等攔頭擊之賊不敢戀戰

悉數狂奔我軍追至二十餘里殲賊無算因天晚俱各收隊查點旗兵陣亡一名馬勇陣亡受傷十餘名自有此戰賊已膽落次日向南回竄劉銘傳潘鼎新兩軍并力緊追初二至初五等日在鄆城荷澤曹縣東明等處或一日一戰或一日再戰該逆被躡窮急三次整眾來犯連不得逞殺傷逃散甚多牲畜器械遺棄遍地潘鼎新一軍初八日趕至杞縣接仗小勝劉銘傳一軍初八日趕至睢州該二軍於兩旬之間往來一千六七百里縱橫追逐迄未停趾現在杞縣陳畱一帶籌備米糧仍卽跟蹤追剿此次賊鋒已挫其勢或可稍衰旣不得志於東必仍狂竄而西臣已檄令劉松山一軍由扶溝以北向前迎剿并檄鮑超

一軍由南陽至南召魯山一帶遮截賊入洛陽之路如果驅賊  
南趨鄂境當一面派兵與鄂軍會剿一面畱兵再辦沙賈雨河  
防守事宜冀收夾擊之效除劉銘傳等軍初二至初五詳細戰  
狀另行續奏外所有淮軍往來追剿獲勝及現籌防剿緣由恭  
摺由驛五百里馳陳伏乞

皇太后

皇上聖鑒訓示謹

奏

彙報近日軍情摺

同治五年十月十三日

奏爲彙報近日軍情恭摺仰祈

聖鑒事竊捻逆全股由山東曹州竄回豫境杞縣扶溝等處  
於九月十三日馳奏在案維時尚不知賊分兩股之說厥後節  
據探稟任賴一股分竄西北徘徊黃河南岸黑岡一帶十一日  
賊至滎澤壩十二日偷挖河隄十三日豫軍礮船趕到會同陸  
軍宋慶等將賊擊退張總愚一股由扶溝分竄西南十四五等  
日攻撲許州適張樹珊一軍由山東追賊回豫十五日聞許州  
告警卽率隊馳援一擊敗之劉秉璋楊鼎勳兩軍亦馳抵許州  
之小召鋪逐賊於潁河東岸頗有斬擒由是各賊遂分東西兩

路其東竄者爲任柱賴汶光一股西竄者爲張總愚全股牛落紅已死其子牛喜接管賊黨或云隨任賴東竄或云隨張逆西竄尙無確信臣於九月十八日檄令劉銘傳潘鼎新張樹珊三軍馳勦東路一股鮑超劉秉璋楊鼎勳劉松山專辦西路一股潘鼎新一軍九月二十日自朱仙鎮拔隊四日而馳抵定陶該逆一日夜行二百餘里先於二十一至二十五等日猛撲運河之袁口開河等處經東軍竭力擊退潘鼎新趕到後逆蹤盤旋於鄆城鉅野金鄉等處二十八九兩日潘鼎新在嘉祥勦賊獲勝劉銘傳於二十九日至鉅野之葛店派張景春等選帶馬隊馳勦賊館十月初一日在羊山擊賊獲勝追至金鄉東北之周

圩收隊現在劉銘傳紫金鄉潘鼎新紫金濟甯之安居賊在金濟之閒張樹珊一軍由虞城馳赴單縣聞賊若不得逞於山東卽竄徐淮圖撲運河李鴻章已至徐州諸軍畢集當可保全運防徐圖兜擊此東路各軍勦賊之情形也賊之西竄者由襄城邾縣汝州一路奔竄鮑超於九月十六日由南陽拔隊初聞賊竄襄城擬由裕州一路進剿及行抵裕州知賊已竄汝邾卽兼程行走二十一日馳抵魯山而賊已遁往汝州之臨汝白沙地方旋由宜陽永甯連夜狂奔鮑超亦由汝州洛陽跟追二十九日抵宜陽之韓城鎮十月初二日至陝州之章茂砦每日均行八九十里至百里不等劉秉璋楊鼎勳兩軍自許州獲勝後取道



新鄭鄭州汜鞏一路十月初二日行至陝州之觀音堂賊知追兵將至遂於閿鄉西南之大峪口繞越潼關以南闌入陝西之商州一帶各軍餉項未到米糧罄盡陝閿商雒萬山之中初冬苦寒士卒寒衣未備萬難再進據逃出難民稱賊以陝西無食可覓意欲由荆紫關竄往湖北等語查商州與鄭陽毗連又近南陽之內鄉鎮平等處鮑超現擬由章茂寨回至南陽劉秉璋擬由觀音堂回至新鄭一面籌備米糧一面備勦回竄之賊劉松山拔隊稍遲十月初三日甫至汝州因賊去已遠卽在汝屬暫駐續候調度此西路各軍追賊之情形也臣查此次賊分兩股奔竄東路一股劉銘傳各軍尙能追及邀擊西路一股鮑超

等奔馳千里未及接仗實深焦憤惟陝西艱苦已極不特官軍米糧子藥籌運萬難卽該逆志在擄掠亦必無所得食恐不久仍將回竄同治二年羣賊銳意入秦三年正月又棄漢中而回竄鄂皖其明證也臣所慮者山西防務僅恃一河賊若北渡竄晉爲患方長伏乞

皇上飭下山西撫臣嚴扼河防保全完善之區若僅在秦境則數月之內又將回竄豫鄂臣已檄飭各軍沿途確探相機迎剿除劉銘傳等在山東各戰應由李鴻章詳細具奏外所有近日軍情緣由謹繕摺由驛五百里具陳伏乞

皇太后

皇上聖鑒訓示謹

奏

病難速痊請開各缺仍畱軍中效力摺

同治五年十月十三日

奏爲

微臣

病難速痊籲懇

天恩准開各缺仍在軍中效力恭摺仰祈

聖鑒事竊

臣

因病請假仰蒙

恩准兩次均賞假一月在營調理兩月以來加意調治而心氣過虧不時出汗不能多閱文牘說話逾十餘句外舌端卽蹇澀異常耳亦重聽不說話時耳鳴而尙不甚聾因是終日不願見客標病則屢有變換近日右腰疼痛陝西撫臣喬松年過此目觀臣狼狽之狀似此病軀久膺重任斷無不償事之理再四籌思不得不仰懇

聖慈請開各缺安心調理惟臣受

恩深重有不敢遽請離營者人臣事君之義苟有所長所短皆可直陳於

聖主之前臣不善騎馬未能身臨前敵親自督陣又行軍過於遲鈍十餘年來但知結硬寨打呆戰從未用一奇謀施一方略制敵於意計之外此臣之所短也臣昔於諸將來謁無不立時接見諄諄訓誨上勸忠勤以報

國下戒騷擾以保民別後則寄書告誡頗有師弟督課之象其於銀米子藥搬運遠近亦必計算時日妥爲代謀從不誑以虛語各將士諒臣苦衷頗有家人父子之情此臣昔日之微長也

今臣病勢日重憚於見客卽見亦不能多言豈復能殷勤教誨不以親筆信函答諸將者已年餘矣近則代擬之信稿亦難核改稍長之公牘皆難細閱是臣昔之長者今已盡失其長而用兵拙鈍勦粵匪或尙可倖勝勦擒匪實大不相宜昔之短者今則愈形其短明知必誤大局而猶貪戀權位諱飾而不肯直陳是欺

君也明知湘淮各軍相信頗深而必遽求離營不顧軍心之渙散是負

恩也

臣

不敢欺飾於大廷亦不忍負疚於隱微惟有籲懇

天恩准開協辦大學士兩江總督寶缺並另簡

欽差大臣接辦軍務臣以散員畱營不主調度賞罰之權但以維繫將士之心庶於軍國大事毫無所損而臣之寸心無忝卽病體亦可期漸愈感激

鴻施曷有旣極所有

微臣

病難速痊請開各缺仍畱軍中效力

緣由謹繕摺具陳伏乞

皇太后

皇上聖鑒訓示謹

奏

淮軍勝仗詳細情形摺

同治五年十月十三日

奏爲官軍在鄆城等處追剿屢勝恭摺補奏仰祈

聖鑒事竊九月初旬直隸提督劉銘傳山東按察使潘鼎新兩軍在鄆城等處剿賊屢勝臣於九月十三日附陳大概聲明續報戰狀在案旋據劉銘傳等呈稱九月初一日該兩軍在梁山破賊後初二日追至鄆城之季家莊與賊相隔半程初三日行抵安興孔集等處探知賊在曹州府東之新集初四日嚮明潘鼎新一軍先馳至新集之南約四五里該逆正思西竄我軍衝入賊陣截賊數段逆勢奔潰劉銘傳一軍馬步亦到追殺十餘里至趙王河沿賊由曹州城北西奔兩軍督隊緊追截殺多名



并生擒擒首與大剛及賊黨二百餘名初五日又及賊於曹縣  
朱家寨該逆因連日被創窘急先驅牌尾南走悉整悍眾迎犯  
其馬賊分數股先撲劉銘傳馬隊步賊分十餘團繼之劉盛藻  
唐殿魁率軍先至張景春率馬隊由黃集迎勦馬步方接戰時  
潘鼎新由周集直趨賊後該逆前後受敵顧應不暇陣勢紛亂  
盡向西南奔潰我軍追殺十餘里該逆又折而東走欲鈔潘鼎  
新後路復經潘鼎琛潘鼎立等從東路擊敗追至桃源驛寨天  
已昏暮收隊暫息是夜賊不敢停畱卽由老黃河向正南奔竄  
初六日由東明界追至新考城之敬勝寨該逆奔向杞睢之間  
我軍跟蹤緊追沿途逃散及歸降者無算初七日劉銘傳至睢

州潘鼎新至蘭儀賊於初八日竄至杞縣潘鼎新從蘭儀南來行至離城二十里之陽堦集正遇賊馬奔馳當卽整隊而前該逆不意官軍又從北面繞出其前未敢交戰棄械亂竄潘鼎琛萬國順潘國揚乘勢掩殺獲馬百餘匹擒斬悍匪二百餘名統計七日之間大小六戰縱橫盪決無役不勝由劉銘傳等呈報前來臣查逆眾東犯銳意竄渡運河自九月初一日梁山一戰賊勢稍卻尙思畱戀東境爲覓食苟延之計劉銘傳潘鼎新兩軍盡力追剿窮賊所往遂使悉數敗竄東省運防無恙固由守禦之嚴亦賴追兵之速其在事出力人員應卽歸入前案彙保所有淮軍在鄆城等處剿賊詳細情形恭摺馳陳伏乞

皇太后

皇上聖鑒訓示謹

奏

調鮑超劉松山兩軍分路援剿摺同治五年十一月初二日

奏爲恭報近日軍情並檄調鮑超劉松山二軍分路援剿恭摺仰祈

聖鑒事竊東西兩路賊情臣於十月十三日馳奏在案西竄之匪十月二十二日以前臣接各路探報均稱賊將回竄豫鄂自二十三日以後五日中探報並無西股回竄之說臣恐該逆深入秦境遂於二十七日檄令鮑超統帶霆軍由鎮平內鄉淅川進剿紫關以達商州入秦援剿東路一股劉銘傳張樹珊等軍二十六日在曹州接仗獲勝該逆狂奔南竄二十八日據報邊馬已至太康臣恐該逆回至豫境又將西竄汝洛圖犯秦晉晉

省防務僅隔一河陝州之三门峡茅津渡一帶河淺石多冰結成橋若乘閒偷渡蔓延晉境尤屬可慮因檄飭劉松山統帶一軍迅赴汝州攔頭截擊遏其西去之路並至陝州三门峡等處與山西臬司陳澍夾河設守力保晉省完善之區惟是霆軍入秦湘軍防晉不特秦省米糧極少有錢無市卽豫省洛陝一帶糧食亦艱貴異常臣已函商兩省撫臣李鶴年趙長齡請其爲該二軍辦糧並函致陳澍囑其設法多辦糧米舟運入渭接濟鮑超一軍陸運渡河接濟劉松山一軍不知能源源購運無誤軍食否相應請

旨飭下趙長齡采辦解濟其糧價運費或由應協臣餉項下扣

抵或由臣另籌解還均無不可抑臣更有慮者鮑超軍中向少明幹之員料理米糧等事前在皖南由臣派員辦糧源源接濟在江西時各官紳亦竭力助糧全無缺乏故能專心打仗所向有功一離江皖至福建者卽有上杭缺糧之譁赴甘肅者又有金口棄舟之變若入秦以後糧米不繼深恐滋生事端從前多隆阿楊岳斌蔣凝學諸軍一入秦境糧賁路遠勇丁逃回者極多以僧格林沁之忠勇辦捻四年有餘凡捻匪所到之處該親王無不躬自追勦惟同治二年捻股入秦該親王未嘗派兵西追想亦因米糧難購之故也此次檄調鮑超文內有云如實無米可辦到萬分爲難之際亦可中途折回並許以兵行至西安

省城爲止不再西征仍奏明專剿擒匪不剿回匪等語與之約定臣蓋鑒於金口之變故特參以活筆預爲維繫軍心之地伏乞

皇上曲賜原諒臣仍一面諄催鮑超西行得尺則尺得寸則寸總期有益秦疆不生他患冀副

聖主眷顧西陲之意所有近日軍情並檄調兩軍援剿緣由恭摺由驛五百里馳陳伏乞

皇太后

皇上聖鑒訓示謹

奏

奉到 諭旨先行覆陳片

同治五年十一月初二日

再臣 欽奉十月二十日

寄諭該大臣勲望夙著積勞致疾自係實情著再賞假一箇月  
在營安心調理欽差大臣關防著李鴻章暫行署理曾國藩俟  
調理就痊卽行來京陛見一次以慰廑系等因欽此跪誦之下  
感悚莫名查統兵大員非身任督撫有理財之權者軍餉必不  
應手士卒卽難用命臣前以侍郎辦賊五年卒無寸功後以江  
督辦賊四年乃有成效深知其中之甘苦現在湘勇及淮北勇  
月餉須七萬有餘淮勇月餉須三十萬有餘皆李鴻章一手籌  
畫本年添出清水潭工江北賑務需銀近八十萬軍餉遂形竭



歷李鴻章或任江督或任蘇撫必有實缺一席乃能籌此每月四十萬之巨款一離江南境內則糧餉軍火均無所出淮湘軍心立見渙散此等情形臣於上年九月本年八月曾經兩次詳奏因

諭旨詢及李鴻章能否移紮豫境不得不再行縷陳上瀆宸聽李鴻章既難離江境則接署關防似可暫而不可久臣自問行軍太呆不能平此流寇精力太衰不能當此大任一俟靈軍西行就緒病體調理稍痊約計臘尾春初入京

陛見一以謝累歲高厚之

恩一以請辦捻不善之罪再當面懇

鴻恩准開各缺并懇於李鴻章外另

簡大臣來豫接辦臣但求開缺以減事權斷不求回籍以圖安逸仍畱軍營幫同照料一切維繫湘淮各軍之心聯絡蘇鄂兩路之氣既無置身局外之想亦免病軀戀棧之譏臣之寸心稍安而於大局毫無所損除將關防擇日派員送交李鴻章另疏恭報起程日期外所有奉到諭旨理合先行覆陳伏乞

皇太后

皇上聖鑒訓示謹

奏

酌籌西路軍務派員辦霆營軍米摺

同治五年十一月十七日

奏爲酌籌西路軍務仍令鮑超一軍援秦並遴派大員專辦霆營軍糧恭摺仰祈

聖鑒事竊臣檄派鮑超一軍援秦劉松山一軍防晉曾於十一月初二日馳奏在案旋接鮑超來文憑陳入秦之難反復辯論所最慮者有三一在米糧之難辦一在餉銀之難解一在回匪之牽制兼以口馬尙未到齊擬在南陽陸續操練一俟馬隊練成陝省米糧轉運等事布置周妥再行入關且引上年進援粵省大吏一面催援一面代爲預備糧草轉運照料客軍至爲周到故進兵雖遲而到防未及十日卽能一戰克捷等因咨呈前

來請臣代爲陳奏臣詳閱該提督所稱均係實在情形惟所慮之三端回匪牽制一節雖屬意中之事然臣前次檄文內許其專剿擒匪不勦回匪業經奏明此時尙無庸預慮餉銀難解一節該營餉項以江西爲大宗撫臣劉坤一力顧大局籌解並未稍遲惟路途太遠轉折太多自難免停軍待餉之憂臣一面咨商劉坤一格外趲早一面咨請河南陝西兩撫臣設法按站接解當不至十分遲誤米糧難辦一節則爲軍中最要之事查有陝州靈寶縣丁憂在籍之江蘇候補道前任蘇州府知府薛書常才長心細熟悉秦晉豫三省交界情形臣已派委該員就近稟請山西撫臣領銀二萬兩商之臬司陳澍就地購糧接濟

軍并以軍士入秦艱苦其買糧之價由臣籌款另發一箇月不扣勇丁月餉一箇月之外續辦糧米由臣加價一半在勇丁月餉中酌扣一半事事籌畫清晰咨覆鮑超去後鮑超未接此咨因接臣第二次催函頃已復信言俟接江西協餉日內即可赴秦矣查署陝西撫臣劉蓉先經疊催鮑超入秦嗣又奏請改派劉松山劉秉璋楊鼎勳三軍入秦不知各軍前在洛陝未能赴秦先後退回者皆由米糧太缺之故若秦中米糧有著則劉楊等軍可往鮑超亦可前往現在劉松山一軍業已馳赴汝洛與陳湜協防黃河力扼賊竄晉省之路楊鼎勳一軍駐防周家口劉秉璋一軍臣前調回山東因行至睢州遇任賴回竄跟蹤追

勦四百餘里現經李鴻章調赴清江接防成子河等處此三軍者一時均難更動惟鮑超一軍人數較眾約束亦嚴本年所過鄂豫境內臣時加訪問並無騷擾情事今又爲之酌加米價廣辦軍糧自不至更有他虞相應奏明請

旨勅下河南撫臣李鶴年行知薛書常本籍催令赴晉領銀并請

旨勅下山西撫臣趙長齡迅籌銀二萬兩發交薛書常採辦米糧以濟軍食而利戎行山西所籌銀兩或由應協臣餉項下扣抵或由臣另籌解還仍如上次所奏辦理霆軍入秦以後離臣一千餘里離李鴻章二千餘里似應由提臣鮑超自行奏報軍

情庶

朝廷之見聞較速調度較靈并懇

寄諭中許以專剿擒匪不勦回匪俾鮑超得以安慰軍士之心免生意外之變是否有當恭候

聖裁所有酌籌西路軍務仍令霆軍援秦并遴派大員採辦軍米緣由恭摺由驛五百里馳陳伏乞

皇太后

皇上聖鑒訓示謹

奏

欽奉

諭旨覆陳摺

同治五年十一月十七日

奏爲欽奉

諭旨恭摺覆陳仰祈

聖鑒事竊臣接准兵部火票遞到同治五年十一月初一日奉上諭曾國藩著回兩江總督本任暫緩來京陛見江蘇巡撫一等肅毅伯李鴻章著授爲欽差大臣專辦剿匪事宜欽此旋准軍機大臣字寄同治五年十一月初八日奉

上諭著曾國藩卽遵前旨將軍務交李鴻章接辦該督卽回兩江總督本任辦理餉需軍火源源籌解俾李鴻章得離江境統兵進剿則籌餉與剿匪之功均爲國家倚重正不必以開缺赴



營始足爲朝廷宣力也等因欽此跪誦之下無任欽感遵卽擇於十九日飭派江蘇候補道林桐芳衡州協副將胡正盛謹齎欽差大臣關防馳赴徐州交李鴻章祇領至臣仍回兩江總督本任一節

朝廷體恤下情不責臣以治軍但責臣以籌餉不令離營勉圖後效但令回署調理病軀

聖恩高厚感悚交并惟兩江總督公牘之煩數倍於軍營而疆吏統轄文武尤以接見僚屬爲要義臣精力日衰用心久則汗出說話多則舌蹇不能多見賓客不能多閱文牘業經屢次陳奏數月以來標病雖除而此二患者迄未痊可若非將舌端蹇

澀之症醫治全愈實難勝江督之任且臣屢陳病狀求開各缺  
若爲將帥則辭之爲封疆則就之則是去危而就安避難而就  
易臣平日教訓部曲每以堅忍盡忠爲法以畏難取巧爲戒今  
因病離營安居金陵衙署迹涉取巧與平日教人之言自相矛  
盾不特畏清議之交譏亦恐爲部曲所竊笑臣內度病體外度  
大義減輕事權則可竟回本任則不可故前兩次奏稱但求開  
缺不求離營蓋自抱病以來反覆籌思必出於此然後心安而  
理得也臣既不能回江督本任而李鴻章新膺專征之  
命又難久署江督之篆亦不可不熟計而兼籌查刻下賊分兩  
股東股任賴等逆竄至光固非西入鄂卽南入皖李鴻章或仍

駐徐州或移駐六安以勦鄂賊或移駐潁州以勦皖豫之賊皆在兩江轄境之內是李鴻章暫署江督於勦辦東股毫無窒礙至西股張逆在秦臣現多方籌辦糧米湘軍防晉業已起行赴洛靈軍援秦卽日亦可入關似兩三月內李鴻章兼署江督尙無損於大局合無籲懇

天恩勅下李鴻章以

欽差大臣暫行兼署兩江總督一面料理出省事宜兩三月後或請另

簡兩江總督或請另

簡欽差大臣或令李鴻章自薦籌餉大員布置後路該大臣出

省之宜遲宜速均聽

皇上權衡定奪屆時臣再具疏請開江督等缺目下謹遵

諭旨暫緩

陛見仍在周口軍營照料一切維湘淮之軍心聯將帥之情誼  
凡臣才力所可勉精神所能到必當殫竭愚忱力圖補救斷不  
因兵符已解稍涉疏懈致乖古人盡瘁之義請釋

宸廑所有欽奉

諭旨恭摺覆奏緣由理合由驛馳陳伏乞

皇太后

皇上聖鑒訓示謹

奏

近日軍情片 同治五年十一月十七日

再東路近日軍情任賴股匪自山東被剿窮蹙回竄豫境初一日渡過沙河由正陽息縣羅山一路狂奔擾及信陽之南將入鄂境鄂軍甫經出隊迎剿卽行折回周盛波一軍跟蹤前進初十日遇賊於羅山縣城之東北逼賊南趨山徑首尾環擊擒斬俘獲甚眾該逆向東南竹竿河一帶驚竄又經馬隊截殺無算奪獲騾馬千餘匹十一十二日該匪竄擾光州光山十三日竄至固始探稱圖犯鄂境此股賊匪先在東省猛撲運河傷亡頗多旋在豐單曹濟一帶經劉銘傳等軍痛剿拋棄器械幾盡此次竄至信陽斫取青竹新矛又經周盛波縱橫攔截沿途遺棄

賊燄實已日衰現飭張樹珊一軍拔隊追擊劉銘傳一軍疲勞  
太久臣令在周口休息兩旬亦卽赴鄂會剿又檄李昭慶全軍  
由潁亳以達光固六安冀與鄂軍一收夾擊之效除周盛波及  
東路各軍詳細戰狀此後均歸李鴻章具奏外理合附陳梗概  
伏乞

皇太后

皇上聖鑒謹

奏

欽奉

諭旨再陳下悃摺

同治五年十二月初三日

奏爲欽奉

諭旨再陳下悃恭摺仰祈

聖鑒事竊

臣

承准軍機大臣字寄同治五年十一月二十三日

奉

上諭曾國藩請以散員仍在軍營自效之處具徵奮勉圖功不避艱難之意惟兩江總督責任綦重湘淮各軍尤須曾國藩籌辦接濟與前敵督軍同爲朝廷所倚賴該督忠勤素著且係朝廷特簡正不必以避勞就逸爲嫌致多過慮著遵奉前旨仍回本任以便李鴻章酌量移營前進並免後顧之憂等因欽此跪



誦之下欽感莫名

臣奏稱卷三十一  
辦捻無效仰荷

天恩不加嚴譴特令回居優缺又蒙

聖慈垂訓解釋避勞就逸之嫌所以曲諒下情者無微不至

具有天良豈不思退勉圖報惟兩江總督一缺事繁任重察吏

筭鹽籌餉諸大端外又有洋務交涉之件

臣舌端蹇澀不能多見屬僚於察吏二字已不克舉其職筭鹽籌餉兩者亦須精神

周到乃能提挈綱領釐剔弊端

臣用心輒汗實難多閱文牘至中外交涉之事

臣素未推究若剛柔失宜不特貽誤事機兼恐有傷

國體細度此缺之繁難斷非病軀所能勝任與其勉強回任辜

恩溺職不如量而後入避位讓賢臣上次摺內請俟兩三月後再行請開各缺目下察看軍情東路任賴一股鄂軍雖獲勝仗尙未大加懲創西路張逆一股已至輜川藍田等處鮑超一軍因等候餉銀馬匹尙未據報起程臣彌深焦灼若非李鴻章迅赴前敵恐軍務終無起色合無仰懇

天恩另

簡兩江總督專辦後路籌餉等事或

勅下李鴻章自薦籌餉大員悉心區畫奏明某款某款專供湘淮各軍俾得出省調度庶幾上釋

宸廑下慰民望臣卽在周口行營調養病體暗中商酌軍務不

敢稍存漠視抑臣更有請者臣才力竭蹶不堪負荷艱鉅曾於同治元年二年三次具奏又於三年十月附片密陳衰狀上年五月十三日瀝陳精力衰頽舌端蹇澀等情臣未北征之前業已五次陳奏並非因辦捻無功而始以引疾爲卸責之地倘必責臣以回任則開缺之疏將累上而不已臣咎愈重宸聽愈煩輾轉耽延徒稽時日大局或因而有損臣心愈無以自安惟有籲懇

天恩俯如所請准開兩江總督協辦大學士兩缺從此安心調治一二年後幸獲全愈臣必趨赴

闕廷再求

簡任圖報

高厚之恩於萬一伏求

聖慈垂察所有欽奉

諭旨再陳下悃緣由恭摺由驛馳陳伏乞

皇太后

皇上聖鑒訓示再此次封摺仿照駱秉章入蜀之例即用木質  
關防拜發合併聲明謹

奏

暫回本任仍駐徐州並陳下悃摺

同治二年十二月二十一日

奏爲遵

旨暫回本任仍駐徐州並再瀝陳下悃恭摺仰祈

聖鑒事竊

臣

承准軍機大臣字寄同治五年十二月初九日奉

上諭前因曾國藩患病未痊軍營事繁特令回兩江總督本任以資調攝並因其請以散員自效復疊次諭令迅速回任俾李鴻章得以相機進勦曾國藩爲國家心膂之臣誠信相孚已久當此捻逆未平後路糧餉軍火無人籌辦豈能無誤事機曾國藩當仰體朝廷之意爲國家分憂豈可稍涉疑慮固執已見著卽凜遵前旨剋期回任俾李鴻章得專意勦賊迅奏膚功該督

回任以後遇有湘淮軍事李鴻章仍當虛心咨商以期聯絡一氣毋許再有固請用慰廑念等因欽此跪誦之下感激莫名臣受

恩極重勦捻無功何敢固執已見不爲

朝廷分憂惟臣屢次陳請開缺實以兩江總督任重事繁非病軀所能勝任累疏所陳均係實情毫無虛飾乃蒙

聖恩寬假勉以弗涉疑慮示以誠信相孚委曲開導無微不至揆之古人遇合之隆無以逾此臣再四躊躇欲回任則自揣一日之精神難了一日之公牘終致貽誤地方欲再辭則臣一日不回本任李鴻章一日不出江境必先貽誤軍事二者兼權仍

以軍務爲重謹遵

諭旨卽於正月初旬回駐徐州暫接兩江總督關防俾李鴻章迅速交卸馳赴前敵仰副

皇上殷殷訓誡之至意惟

微臣

之下忱有不能不再陳於

聖主之前者江督爲疆吏最崇之位又爲目前完善之區

臣

一

回金陵則軍事之成敗利鈍不至叢責於一身卸至重之肩居

極優之缺於

臣

私計豈不甚便惟

臣

久任將帥有功則受賞無

功則免罰旣覺無以謝清議而

臣

平日教人常以畏難取巧爲

戒今因告病而回任迹涉取巧尤覺無以對部曲豈可便一時

之私圖盡喪平生之素守且

臣

曾奏稱捻匪已成流寇勦辦極

無把握爲患方長等語兩次密陳在案今又擾及陝西流竄六  
省縱橫三千餘里剽疾如風李鴻章一人接辦尙恐照料難周  
今卽萃各路之兵將竭天下之財力專辦捻匪猶難遽滅縱其  
不能亦當遵照上年九月初六日

寄諭東西兩路分別辦理李鴻章精力方盛新綰兵符統籌全  
局駐紮則以西路爲主臣駐紮徐州防剿惟以東路爲主一以  
爲李鴻章後勁之助一以爲微臣補過之資至臣病體未痊不  
能多見賓客不能多閱文牘業經疊次詳奏力疾以圖軍事斷  
難兼顧地方重任惟有籲懇

天恩從容籌議另



簡兩江總督仍俾臣以散員效力行開感沐

鴻慈實無既極兩三月後臣再當剴切具奏理合預爲陳明伏求

聖慈垂察至中外交涉事件臣素未講求殊慮輕重失宜查兩淮運司丁日昌自廣東差旋尙未回任該員精思果力熟悉洋務合無仰懇

天恩明降

諭旨准令丁日昌暫行護理通商

欽差大臣關防必能有裨時局臣精力衰頹迹近推諉曷勝戰栗惶悚之至所有遵

乞旨暫回本任仍駐徐州並再瀝陳下榻緣由恭摺由驛馳陳伏

皇太后

皇上聖鑒訓示謹

奏

近日軍情片

同治五年十二月二十一日

再近日軍情東路任賴一股盤旋安陸之白口等處鄂軍疊次獲勝十二月初六日郭松林挫衄一次沈鴻賓營壘被圍苦守獲全十一日彭毓楠熊登武譚仁芳等三軍在沙港地方鏖戰竟日殺傷相當十二日該逆逼近安陸府城劉維楨一軍乘夜擊之遂折而東趨十五日姜玉順一軍在應城迎剿以兵力太單未能扼截臣接曾國荃十六夜來信賊之頭隊已至義堂鎮距德安府城四十餘里必向孝感大路奔竄等語計算援剿之師鮑超一軍於初九日行抵棗陽周盛波張樹珊兩軍初九日至隨州劉銘傳劉秉璋兩軍亦向隨棗一路進發兵力均在鄂

省西路賊知援兵將至疾馳東趨此勦彼竄備多力分迄無制勝之策現惟檄令鮑超劉銘傳等軍仍向鄂東分途追勦不知能否補救曷勝憂憤西路張逆一股疊據各路報稱賊由臨潼縣屬之交口等處渡過渭北勢將竄擾同朝窺伺晉省臣前於初九日接鮑超來文因任賴股匪逼近襄陽業經自行奏明移師赴鄂先勦東股等語臣以籌畫月餘無兵入秦正深焦灼次日接喬松年函稱鮑超若由荆紫關入秦正恐逼賊愈西轉形棘手若由潼關進兵機勢較順臣卽改檄劉松山速從潼關入秦頃據劉松山稟報已於十六日自洛陽拔隊援秦年內必入潼關或可在同朝等處設法攔勦保全晉省完善之區劉松山

張錫嶸等既已入秦應卽在陝州設立糧台仍派候補道薛壽常管理江南之餉銀洋藥等件擬由徐州雇備長車解至河南省城請

旨勅下河南撫臣李鶴年亦雇長車轉解陝州如此分段遞運較易集事至三河茅津渡一帶河凍冰堅必須有兵與晉省夾河設防已商之李鴻章於淮勇中酌調一兩軍逕赴陝州駐紮矣謹附片具陳伏乞

皇太后

皇上聖鑒訓示謹

奏

回駐徐州接篆任事摺

同治六年正月二十一日

奏爲

微臣

回駐徐州接篆任事恭摺仰祈

聖鑒事竊

臣

於正月初三日承准軍機大臣字寄同治五年十

二月二十七日奉

上諭曾國藩於來年正月初旬接兩江總督關防後卽著回駐  
徐州力顧東路并顧李鴻章後路辦理糧餉無令缺乏江督事  
繁責重此豈可以安逸之時該督自以迹涉畏難取巧無以對  
部曲未免鰓鰓過慮所請令丁曰昌暫護通商大臣關防丁曰  
昌係該督所屬卽著責成該員妥辦中外交涉事件仍由該督  
統率無庸令其護理關防等因欽此

聖恩優渥指示周詳聞

命之下敢不懍遵卽於初六日自周家口啟程十五日行抵徐州府城十九日署督臣李鴻章派員將兩江總督關防兩淮鹽政印信并通商

欽差大臣關防賫送前來臣當卽恭設香案望

闕叩頭祇領任事伏念臣精力日頹治軍無效本不敢再膺繁劇貽誤地方仰蒙

皇上訓誡再三曲爲開導不責其畏難取巧并

諭以事繁責重所以解釋疑慮啟發顛愚者無微不至循誦聖訓感慚無地惟有誓竭心力圖報涓埃常早作而夜思求盡

忠而補過庶以仰答

高厚鴻慈於萬一所有

微臣

回至徐州接篆日期恭摺由驛馳

陳伏乞

皇太后

皇上聖鑒訓示謹

奏



近日軍情並陳鮑超暫緩入秦片

同治六年正月二十一

再近日軍情任賴股匪於上年臘杪又竄白口一帶欲從豐洛河搶過襄水均經鄂中水師擊退劉銘傳一軍緊躡賊後疊有斬擒正月初一日繞出賊前在冠山口獲一勝仗軍氣頗振該逆受此懲創折而下趨據曾國荃來信言鮑超劉銘傳劉秉璋周盛波等軍會合鄂軍三面布置頗密再調李昭慶一軍由信陽至宋河則四面有合圍之勢但地方遼闊賊情詭譎不知能否聚殲等語查此次賊竄鄂境忽東忽西變遷無定勦辦流寇本不可以無定之賊蹤改已定之成局鮑超一軍前經議定援秦不應於十二月初三日奏改援鄂既已援鄂則鄂事未清不

應遽奏赴秦該提督急於立功曾國荃亦無定見遂均有前後歧異之處疊奉

諭旨飭責洵屬明見萬里無微不照臣在歸德途次聞任賴亦有入秦之意恐鮑超從荆紫關援秦而潼關一路空虛萬一任賴西趨汝洛則秦晉兩省均屬可慮已於初十日檄令鮑超緊躡任賴一股無令再竄秦中凡賊在開封以西如南陽汝甯許州境內均與之縱橫追逐如任賴至汝州河陝等處亦卽跟蹤西行助晉省河外之防爲陝省援師之繼等語檄行去後頃來徐州與李鴻章熟商亦以爲現僅劉松山一軍入秦糧運已極不易若使任賴續竄陝省則各軍皆須赴秦以四五萬人之糧

餉從江南運至陝西勢必竭蹶貽誤自應暫留鮑超一軍於豫西攔截任賴不使西竄俟任賴一股賊情定後再行奏調霆軍赴秦乃爲穩著是否有當理合附片陳明伏乞

皇太后

皇上聖鑒訓示謹

奏

報銷款目分四案開單摺

同治六年二月初八日

奏爲造報軍需款目分爲四案開列簡明清單恭摺仰祈

聖鑒事竊臣接准部咨同治三年七月初十日內閣奉

上諭軍需報銷一事本有例定章程惟近來用兵十餘年蔓延  
十數省報銷款目所在多有若責令照例辦理不獨虛糜帑項  
徒爲委員書吏開需索之門而且支應稍有不符於例卽難核  
准不得不著落賠償將帥宣力行聞甫邀恩錫旋迫迫呼甚非  
國家厚待勲臣之意著照該部所請所有同治三年六月以前  
各處辦理軍務未經報銷之案准將收支款目總數分年分起  
開具簡明清單奏明存案免其造冊報銷等因欽此仰見我

皇上蠲除煩苛務崇大體之至意臣自咸豐三年帶兵以來統轄日廣條目太繁曾於咸豐七年十二月酌擬報銷大概規模陳奏一次十年四月奉

命署理兩江總督卽於五月附片奏明擬自咸豐三年至十年五月分作三案造冊報銷并先將咸豐三年九月起至六年十二月止作爲第一案專摺具奏照例造冊咨部在案臣初出帶兵并未奏派大員總理糧台收放各款隨時遴員經管咸豐四五六七年以今湖南撫臣李瀚章前任守令時經手者居多八九兩年以江西候補知府張韶南經手者居多十年五月忝任江督以後始奏明於江西省城設立總糧台派江西布政使總

司其事臣時駐紮祁門另設行營支應糧台添委江西建昌府知府隋藏珠與張韶南會同經理至十一年秋克復安慶圖攻金陵又於安慶立台名曰江外糧台調隋藏珠管理而以江西候補知府王延長副之其畱於祁門者支應皖南諸軍名曰山內糧台其時張韶南物故派安徽候補知府李興銳始終其事其隨臣弟曾國荃在安慶金陵者則有江西候補知府李作士等員別無台局名目但在舟次支應而已臣統軍甚久人數甚多款目甚鉅而委員極少前後十餘年大小委員不滿四十人以故浮費較少頭緒易清此臣營歷年支放軍需大概情形也同治三年七月奉到

諭旨飭開簡明清單卽札行各省台局開送歷年所解餉項總數彙齊核對嗣准各處陸續送齊卽於四年十一月在安慶省城設立報銷總局派安慶江西兩省布政使總理其事仍令王延長李興銳二人專司勾稽以資熟手又添派安徽候補知府彭嘉玉幫同查核其江西總台案卷則由江西布政使派委候補同知直隸州陳長吉齎至安慶會同清釐一年以來各該員等逐款稽查悉心覈算開單則期於簡明底冊則歸於詳核茲據署安徽布政使吳坤修江西布政使孫長紱前署安徽布政使調任湖北布政使何璟會同詳稱自咸豐三年九月起至六年十二月底止前經具奏者茲亦重開一單列爲第一案共收

銀二百八十九萬一千四百一十九兩五錢有奇收米五萬三千七百四十九石八升有奇共支發銀二百六十六萬七千三百七十一兩六錢有奇支放米三千七百九十九石五斗八升有奇所餘銀兩及餘米變價等項共計存銀二十九萬一千三百九十四兩一錢有奇其自咸豐七年正月起到二月二十日丁憂回籍之日止陸續支放及各項雜款未經列入初案者另開一單作爲第二案共支發銀二十九萬一千三百九十四兩一錢有奇自咸豐八年六月臣由原籍起復帶兵援浙之日起至十年月底止開列一單作爲第三案共收銀一百六十九萬一千六百七十六兩一錢有奇收錢一千一十九串有奇



共支發銀一百六十二萬七千四十六兩八錢有奇支發錢一  
千一十九串有奇自咸豐十年五月臣接任兩江總督起至同  
治三年六月克復金陵止開列一單作爲第四案共收銀一千  
六百八十五萬四千五百九十兩七錢有奇收錢九十六萬五  
千五百五十二串有奇共支發銀一千六百七十六萬三千七  
百七十五兩有奇支發錢八十九萬二千八百六十三串有奇  
以上四案均就實收實放之款逐一開報其各軍欠餉及協濟  
各路銀錢等款另行分析開單具詳請奏前來臣查向來軍營  
放款緩急多少糧台委員得以主持其事臣營則十餘年來無  
論支發何款無不親自裁度雖有不合例之供支從無不核實

之款目同治二三年閒統軍至十餘萬人欠餉至十五六箇月  
從未有兵勇向糧台索餉滋鬧者一由於糧台之銀隨到隨發  
從無存畱一由於發餉之際概由微臣斟酌不與委員相干因  
是差免於浮冒之弊而卽以取信於將士之心此次彙辦報銷  
爲時閱十二年之久用款至二千一百三十餘萬之多臣復加  
查覈均係確鑿可據除自三年六月以後至四年五月北征之  
日止臣督飭各員接辦照例報銷外所有咸豐三年九月起至  
同治三年六月底止軍需款目分爲四案開列簡明清單恭呈  
御覽謹專摺具陳伏乞

皇太后

皇上聖鑒勅部查照辦理謹

奏

恭報自徐州起程日期摺

同治六年二月十四日

奏爲屢奉

諭旨移駐金陵恭報起程日期仰祈

聖鑒事竊臣於正月二十九日承准軍機大臣字寄同治六年正月二十四日奉

上諭曾國藩既經接受兩江督篆所有察吏籌餉及地方應辦事宜均關緊要且金陵亦不可無勳望素著大員坐鎮著卽回住省城以資鎮攝該督公忠體國自當仰體朝廷倚畀之隆勉爲國家宣力一切軍情並調度事宜仍著李鴻章隨時咨商以資裨益等因欽此旋於二月初一日又奉正月二十六日

寄諭曾國藩奏赴徐接印任事一摺覽奏欣慰著該督卽遵前  
旨回駐江甯省城籌辦糧餉及地方事宜以資坐鎮等因欽此  
跪誦之下感悚莫名臣辦捻無效夙夜疚心自交卸兵符以後  
鮑超捷於湖北劉松山屢勝於關西雖較之去歲微有起色  
而寇氛仍未大衰殄滅尙無把握臣展轉憂惶以回任爲可愧  
之事幸李鴻章忠果耐勞毅然以勦捻爲已任或可分  
宵旰之憂臣履補微臣之愆咎而淮湘各軍將士人人以餉絀爲  
慮

朝廷亦恐後路或不應手前敵卽難奏功殷勤

訓誠至再至三臣仰承

慈訓定於十六日由徐起行回駐金陵籌辦一切臣用心輒汗  
之病近已漸愈披閱公牘尙能盡職舌端蹇澀之病猶未痊愈  
疆臣之職每日至少須見客五六次察看僚屬詢訪教戒乃爲  
稱職臣到省之後加意調理如實不能多見賓客自度不克舉  
其職仍當據實陳情不敢以病軀戀棧如稍可支持自度不至  
曠官亦不敢託疾飾辭上負  
高厚生成之德所有微臣自徐起程回省日期恭摺由驛三百  
里馳奏伏乞

皇太后

皇上聖鑒訓示謹

奏

奏

張錫嶸在陝西陣亡請加 恩片 同治六年二月十四日

再翰林院編修張錫嶸於本年正月初六日在陝西西安府雨花寨地方剿賊陣亡業經喬松年奏奉

上諭張錫嶸着追贈翰林院侍講學士銜照侍講學士例議卹以慰忠魂欽此欽遵在案竊維張錫嶸由翰林院編修大考高等歷蒙

文宗顯皇帝簡用山西副考官雲南學政當其入雲南時人人視爲畏途自抵貴州境後驛路動多梗塞州縣全無供支張錫嶸毅然遄征往往徒步而行雜糧充飢逮抵滇省後守城數次全未開考卽丁父憂又復微行賊中間關回皖臣時在安慶與



之接晤聞其往返滇南不避艱險又見其誦法先儒學有本源  
卽已深器其人四年六月臣駐軍臨淮檄令張錫嶸辦理營務  
旋令招募靈璧勇立爲敬字三營朝夕訓練該編修戎衣短後  
帕首韉刀能於烈日雨泥之中奔走不輟靈璧爲淮北瘠苦之  
區其勇丁極耐勞苦慣食麥麪臣舊部湘勇及李鴻章淮南之  
勇均不慣於麪食臣常慮其於北路不甚相宜旣見張錫嶸募  
成淮北一軍則期望甚切意欲儲爲西北之用曾於四年七月  
五年正月兩次具奏并於五年十一月十七日將張錫嶸附片  
密保謂其習勞耐苦不名一錢與劉銘傳潘鼎新劉松山三人  
並稱蓋一則以張錫嶸堅苦有守意欲稍加磨鍊漸付艱鉅之

任一則以微臣衰病侵尋意欲求賢自輔冀收桑榆之效也臣  
前撤湘軍十餘萬人獨畱劉松山一軍因其紀律嚴明戰守可  
靠上年臘月檄張錫嶸與劉松山會合援秦令與湘軍同戰以  
資觀摩不料正月初六日之役張錫嶸身率百餘卒親自陷陣  
登時負傷殞命聞報之下深爲慟惜旣惜該編修好學耐勞齋  
志以終亦惜勇丁之習慣麪食宜於西北者統將不易再得也  
頃臣回駐徐州張錫嶸之長子張志敦匍匐來營年僅十三歲  
已讀經書衣不掩脛家計困窮蠶焉傷之謹將張錫嶸生平志  
行及臣所屬望於該員者略陳梗概可否將其子張志敦量爲  
加恩之處出自

聖主格外鴻施理合附片具陳伏乞

皇太后

皇上聖鑒訓示謹

奏

報回省日期並近日軍情摺

同治六年三月二十日

奏爲恭報

微臣

回省日期並陳近日軍情恭摺仰祈

聖鑒事竊臣移駐金陵起程日期於二月十四日具奏在案拜摺後十六日自徐州至韓莊由運河水路南下二十二日查看成子河防務二十三日行抵清江與漕臣張之萬晤商一切二十六日至清水潭驗視新修河隄三月初三日至七濠口查閱瓜洲鹽棧初六日行抵江甯省城旬日來接見僚屬披閱文牘勉力支持深以不克稱職爲懼疊據各路稟報鄂省賊股由皖境回竄後盤旋黃陂黃岡等處現又擾及雲夢向西北竄走或由德隨遁入豫境或由安陸偷渡漢水均屬可慮臣接李鴻章

會國荃來函均擬令鮑超由樊城會師東下惟該提督兩次奏請開缺不知其傷疾舉發近狀若何臣已馳函再三勸誠勉其力疾進兵不知能否迅速拔隊至陝省股匪劉松山一軍自二月十五夜攻破銀渠金渠後該逆竄過渭北二十一日劉松山進軍郿縣探知張逆已與回逆合股勢頗蔓延三月初一日我軍出隊迎擊踏平沿河賊巢奪回村莊十餘處該軍自援秦後連次獲勝似於戰事尙有把握惟擒匪之狡譎回匪之齊心均屬悍寇而進兵愈遠運糧愈難孤軍深入尤不放心臣屢囑其暫圖穩慎俟各軍四集別有後繼之師再爲猛攻之計臣勦擒年餘無功而返臣弟國荃所部屢次敗衄憂愧無地惟有謹遵

諭旨力籌軍餉源源接濟俾前敵不至匱乏軍心藉以維持或可補救愆尤仰答

高厚鴻慈於萬一所有微臣回省日期及陳近日軍情緣由謹繕摺由驛三百里馳陳伏乞

皇太后

皇上聖鑒訓示謹

奏

通籌酌解陝甘軍餉片

同治六年三月二十日

再臣於二月初七日欽奉

寄諭陝省需餉萬緊飭令於協甘專餉內按月籌銀二萬兩專解陝西等因又於二月十五日欽奉

寄諭甘肅餉項支絀必得各省協濟飭令酌量情形每月究能撥解若干據實具奏等因欽此查協甘餉銀除江海關月撥銀一萬兩外臣於四年五月奏定每月協濟三萬兩自五月起至十月止按月均交楊岳斌提餉委員轉解十一月以後李鴻章議定以二萬兩解楊岳斌軍營以一萬兩解穆圖善軍營按月解至五年六月止尙未絲毫短少五年六月以後清水潭決口

江北釐課大減李鴻章奏明協甘之款先儘收數分作三股以兩股撥陝甘督臣軍營以一股撥甯夏軍營約計每月尙有二萬兩統計四年五月以後解過銀六十餘萬臣此次回任後核計應發餉項如淮勇各軍剿捻之師劉松山援陝之師鮑超援鄂之師及籌解京餉本省應撥綠營漕標兵餉淮揚太湖水師月餉皆係無可議減之款統算一年入數較之出數不敷甚鉅淮軍每年正餉僅放九關久欲設法增添而計無所出實爲臣疚心之事卽上海鐵廠今年擬造輪船亦尙無款可籌論目下江南情形本難兼顧外省協餉惟協助甘肅軍需萬無可推諉之理臣仍照原奏每月三萬兩之議按月籌解卽指定之江北



釐金或月收不及三萬亦當以他款補足以期有言必踐若欲於協甘之外添協陝餉實屬無此餘力臣再四思維陝甘軍務本屬相聯一氣目下甘回常竄陝境陝捻亦近甘界軍務本須通籌協餉亦可融解擬於每月協甘三萬兩內以二萬兩解甘肅軍營以一萬兩解陝西軍營仍俟籌解兩三月後察看兩省軍務孰緩孰急再行定議如此通籌酌解則甘肅軍營合之浙江劃抵之一萬兩每月可得蘇餉三萬兩陝西軍營每月可得蘇餉一萬兩如此酌盈劑虛庶足以資周轉理合附片覆陳伏乞

皇太后

皇上聖鑒訓示謹

奏

鮑超傷疾甚劇酌調大員統軍摺

同治六年四月初七日

奏爲提督鮑超傷疾甚劇酌調大員南來統軍恭摺仰祈

聖鑒事竊浙江提督鮑超傷疾舉發兩次奏請開缺調理未蒙  
允准臣亦以軍情正緊馳書鄂中再三勸勉屬其力疾進兵尙  
未接該提督回信頃接李鴻章函鈔寄霆營各鎮將宋國永等  
公稟瀝陳鮑超病狀據稱本年正月間楊家澤接仗獲勝後鮑  
超督隊追賊五晝夜迄未少息虛火上炎兩目盡赤嗣以發表  
太過引動舊傷日益增劇左手已麻木不仁頂上傷疤肉跳轉  
側呻吟三月十二日昏暈一二時之久痰湧咽喉良久始蘇又  
加左肋之傷亦復跳痛不止竊屬萬分危險請迅派大員前來

接統近日尙可親爲交代萬有不測更無人親算交代等語臣  
接閱之下不勝憂灼鮑超帶兵十餘年肅清東南無役不從實  
爲第一著名驍將其受傷多而且重眾所共知今宋國永等縷  
稟如此當無捏飾臣現已派員前往襄陽攜帶藥物屬其酌量  
情形如實難支持卽由李鴻章奏明前來江甯安心調理或可  
冀其漸次痊愈惟霆營人數較多立功最久各營官類皆百戰  
餘生資望相等非有才智卓越情誼相聯之大員難勝接統之  
任查鮑超部下諸將以宋國永婁雲慶二員爲最著宋國永前  
在江西之沙井湖北之金口不能定亂因案革職此次在營出  
力尙未奏請開復且其才欠剛斷不足以資統率惟現署直隸

提督正定鎮總兵婁雲慶臨敵調度條理秩然同治三年駐軍  
上杭各勇以缺餉譁譟該員從容鎮靜危而得安是其才堪應  
變已有明證目前劉長佑添練新兵保衛畿輔亦屬需才孔亟  
之際然較之鄂豫等省賊氛之熾湘淮各軍求助之殷究有緩  
急之殊而婁雲慶在直隸曰淺尙非必不可少之員以之接統  
霆軍則可和輯眾心李鴻章來函反覆熟商與臣意見相同合  
無仰懇

天恩勅下直隸督

臣

劉長佑迅卽派員接署提督篆務俾婁雲

慶卽日交卸由天津乘坐輪船前來江甯

臣

與之商定一切速

赴軍營庶霆軍得有主持之人鮑超卽可安心養病如鮑超病

勢日愈無須更換統領臣當令婁雲慶另募一軍在於安慶認真訓練其餉項取之湖北卽以郭松林彭毓橘兩部裁撤之款作爲婁雲慶新軍之餉臣當常坐輪船馳至安慶親督操練務成勁旅以遏寇氛前月賊至黃梅宿松之交安慶及附近州縣遷徙一空逮淮軍星馳往援賊又倏忽西趨若此軍練成則皖鄂之江濱有備各淮軍專勦北路李鴻章可省南顧之憂於大局似有裨益所有酌調大員南來統軍緣由謹會同湖廣總督臣李鴻章恭摺由驛五百里馳陳伏乞

皇太后

皇上聖鑒訓示謹

奏

奏撥二成洋稅銀片

同治六年四月初七日

再臣回任後通計餉需款目一年入數較之出數不敷甚鉅且

有萬不容緩之事須另行籌款者約計數端如製造輪船實爲

救時要策上海開設鐵廠在滬及洋購買機器兩副大致已屬

全備而造船一事則以無款可籌尙未興辦臣前在安慶曾試

造一小輪船不甚得法李鴻章苦心經營獨得要領現在江甯

上海各局製造洋礮洋鎗洋火等項均用內地匠人能學外洋

機巧以必應速辦之事又有可乘之時有可用之人而坐困於

無可撥之銀殊覺機會可惜此一端也勦捻之師如劉松山一

軍例支月餉六萬兩入秦以後因添發米價運費將近七萬今



年尙僅解去兩關該軍孤懸西陲日與捻回兩寇接戰深恐餉  
項不繼或生他變淮勇諸軍人數較多靈軍湘軍上年均發滿  
餉淮勇僅發九關臣寸心抱歉久欲略爲增添而計無所出近  
則蘇局釐金大減滬釐亦遠不如前鹽務則久無起色似此情  
形并不能足九關之數目下三四兩關卽難湊齊夙夜憂懼深  
恐無以維繫軍心此又一端也捻逆馳突無定臣常謂北以黃  
河防務爲主東以運河防務爲主南以大江防務爲主能守定  
此數處不使賊蹤竄過一步大局尙不至決裂而長江上下數  
千里僅恃水師絕少陸兵北岸沿江最要郡縣安慶僅有兩營  
揚州亦僅兩營滁州和州無爲州並無一兵臣思添練數營布

置各城爲思患預防之計免致如二月間賊竄江濱上下千里紛紛遷避亦以無款可籌迄未舉行此又一端也運河自清水潭以外處處卑薄墊塌險工林立前月漕臣奏修堤壩又另片奏挑張福口引河修復新隄三案分別勸捐撥款辦理臣經過淮揚察看商民太苦旋經咨商停榻而各工均不可緩銀款又無可撥此亦一端也臣在營十餘年每謂疆臣自有籌餉之權從不敢以支絀情形輕瀆

宸聽今江南雖已肅清民力實尙窮困入款祇有此數出款常有加增卽京餉及協濟陝甘霆軍之餉義亦不可少減至製造輪船等事福建尙奏撥鉅款新立鐵廠江南已有鐵廠豈可置

之不辦再四思維實有萬難周轉之勢查江海關洋稅一項自扣款清結以後提解四成另款存儲部庫本係奏定專撥之款未敢動用絲毫惟現當餉需萬緊合無仰懇

天恩俯准將洋稅解部之四成酌留二成以濟要需如蒙

俞允臣擬以一成爲專造輪船之用以一成酌濟淮軍及添兵等事其餘二成仍隨時按結報解俟輪船辦理就緒各軍餉項稍裕卽當奏明仍按四成全數解部以符初議理合附片陳請伏乞

皇太后

皇上聖鑒訓示謹

奏